

ապարանջաններ և մատնիներ՝ 3—4 մատանի։ Ահա նրա արդուզարը և նա պարտական է ամենայն խոնարհութեամբ իր նոր գնացած տանը գտնուող բոլորին, և տարեկանից մինչև ծերունիներին ծառայելու, որպէս սպասաւոր։ Նա իրաւունք չունի երևալու մարդկանց մէջ — ախր ջահէլ զայֆի (կնոջ) համար այիբ (պահասութիւն) ա խօտալը ու մարդամէջ երևալը։ Նրանք գլխով կամ շարժումներով են յայտնում իրենց միտքը։ Բացի այդ, ամբողջ տարւայ ընթացքում միայն երկու անգամ եկեղեցի գնալու իրաւունք ունեն — Ծննդեան և Զատիկի տօներին, այն էլ հաղորդւելու համար։ Այսպէս, նորահարսը ստրկական մի կեանք է վարում տան մէջ, ուր բոլոր անդամները հրամայում են նրան։ Նոյնիսկ ամուսինն իշխում է անսահման կերպով իր կնոջ վրայ։ Նա հրամայում է, պահանջում է իր կամքը կատարել տալու համար, իսկ եթէ կինը համարձակուում է նրա հրամանի դէմ գնալ, այն ժամանակ լսում է կոպիտ և անվայել խօսքեր, յանդիմանութիւն, շատ անգամ էլ նոյնիսկ ծեծւում է, մի խօսքով նա հլու գործիք է և ստրուկ հպտակ իր ամուսնոյն։

Ման, քաղումն և մեռելոց։ Երբ Փէրիայում մէկը մեռնում է, ազգականները և հարեան կանայք լցւում են մեռելատանը և հին հայկական սովորութեան համաձայն սկսում են բարձրաձայն ողբալ։ Եթէ մեռնողը տան հայրն է, նրա գովքն են անում, — «Մեր տան խէր ու բարաքեաթն էիր, տան մեծաւորը, մեզ շարշտայ (հրաման) տող», իսկ եղբայրը ողբում է քրոջն. «Քոյրիկ, տունն անտէր է մնացել», քոյրն էլ մխիթարում է նրան ասելով «Քեզ մեռնեմ, տանդ էլ մեռնեմ եղբայր»։

Եկւորների թիւը խիստ շատ է լինում, որովհետեւ հանգուցեալի համարեա բոլոր ազգականները, ծանօթներն ու բարեկամները, հայկական հնաւանդ սովորութեամբ, իրենց պարտքն են համարում ներկայ լինել մեռելի տանը։ Իսկ հանգուցեալին ամեն մի մօտ ծանօթի ու բարեկամի գալու միջոցին սգաւորները նորոգում են իրենց սուգը բարձրաձայն ողբալով։